

No. Soalan: 436  
PR-1353-T01582

**PEMBERITAHUAN PERTANYAAN BAGI JAWAB BUKAN LISAN**  
**DEWAN RAKYAT MALAYSIA**

**PERTANYAAN : JAWAB BUKAN LISAN**

**DARIPADA : DATO' SERI HAJI ABDUL HADI BIN AWANG  
[ MARANG ]**

**SOALAN : Dato' Seri Haji Abdul Hadi Bin Awang  
[ Marang ] minta MENTERI LUAR NEGERI  
menyatakan berapakah jumlah bantuan  
Kerajaan Malaysia kepada etnik Rohingya  
sejak krisis tercetus pada tahun 2012 hingga  
2017 mengikut pecahan tahun.**

## JAWAPAN

Tuan Yang di-Pertua,

Terima kasih YB Marang di atas pertanyaan yang diajukan.

2. Malaysia sememangnya amat prihatin terhadap tindakan kejam dan penindasan yang dihadapi oleh etnik Rohingya. Selain daripada membawa isu ini ke perhatian antarabangsa, Malaysia juga telah menghantar bantuan bagi meringankan penderitaan etnik Rohingya.

3. Semasa Sesi Tergempar di Peringkat Menteri-Menteri Luar Negeri OIC mengenai situasi minoriti Islam Rohingya di Myanmar pada 19 Januari 2017 di Kuala Lumpur, YAB Perdana Menteri telah mengumumkan sumbangan sebanyak RM10 juta bagi membiayai usaha kemanusiaan dan projek pemulihan sosial di Rakhine.

4. Seterusnya pada tahun yang sama, Kelab Putra 1 Malaysia (KP1M) dengan kerjasama Majlis Perundingan Pertubuhan Islam Malaysia (MAPIM) telah menganjurkan secara bersama Misi Kemanusiaan '*Food Flotilla for Myanmar*' ke Yangon, Myanmar dan Cox's Bazar, Bangladesh. Pelepasan (*flag-off*) misi kemanusiaan tersebut telah dirasmikan oleh YAB Perdana Menteri pada 3 Februari 2017 di Pelabuhan Klang.

5. Misi kemanusiaan ini membawa kira-kira sebanyak 2,000 tan barangan keperluan seperti makanan, perubatan dan '*hygiene kits*' dengan kapal Nautical Aliya. Seramai lebih kurang 200 orang sukarelawan dari

pelbagai negara turut terlibat dalam misi kemanusiaan ini meliputi negara-negara ASEAN, Amerika Syarikat, Perancis dan China.

6. Misi kemanusiaan yang sama juga telah dianjurkan oleh KP1M pada bulan Oktober 2012, berikutan konflik di Rakhine yang tercetus pada bulan Jun 2012.

Tuan Yang di-Pertua,

7. Susulan daripada insiden keganasan terkini yang tercetus pada 25 Ogos 2017 di Rakhine, YAB Perdana Menteri telah mengarahkan iM4U, dengan kerjasama Angkatan Tentera Malaysia (ATM) di bawah kelolaan Pejabat Perdana Menteri untuk menghantar bantuan kemanusiaan kepada pelarian Rohingya di Bangladesh bagi mengurangkan bebanan Kerajaan Bangladesh yang menerima kemasukan pelarian Rohingya yang tinggi dalam masa yang singkat ke Bangladesh. Sebanyak 12 tan barangan keperluan seperti beras, susu dan 'hygiene kits' telah dibawa melalui pesawat tentera A400 selamat tiba di Chittagong pada 9 September 2017.

8. Pada 7 Oktober 2017, bantuan kemanusiaan susulan sebanyak 29.57 tan telah dihantar ke Chittagong, Bangladesh melalui pesawat MASKargo. Bantuan kemanusiaan ini diagihkan ke kem-kem pelarian Rohingya di sekitar sempadan Bangladesh-Myanmar. Pihak iM4U di bawah kelolaan Pejabat Perdana Menteri bercadang untuk menghantar keseluruhan 72 tan bantuan kemanusiaan untuk pelarian Rohingya di Bangladesh secara berperingkat.

9. YAB Perdana Menteri telah mengarahkan Kementerian Kesihatan Malaysia (KKM) untuk menerajui inisiatif bagi menubuhkan sebuah hospital medan di kawasan berhampiran kem-kem pelarian Cox's Bazar, Bangladesh dengan kerjasama Angkatan Tentera Malaysia (ATM). Hospital medan ini akan beroperasi dalam masa terdekat.

Tuan Yang di-Pertua,

10. Selain daripada bantuan yang diusahakan oleh Kerajaan Malaysia, Badan-Badan Bukan Kerajaan (NGO) Malaysia seperti MERCY Malaysia, MAPIM, KP1M, Global Peace Malaysia (GPM), *Malaysian Relief Agency* (MRA) dan Serantau Muslim aktif menjalankan kerja-kerja kemanusiaan di Rakhine.

11. Aktiviti kemanusiaan yang dijalankan oleh NGO-NGO ini adalah hasil daripada sumbangan yang disalurkan dan sokongan daripada rakyat Malaysia yang prihatin dan bersimpati akan penderitaan etnik Rohingya di Rakhine.

Sekian, terima kasih.